



## Creithiau

*(Wedi imi gwrdd â goroeswr o'r Holocaust)*

Daeth i'n plith fel unrhyw daid,  
Ei wyneb yn grychau, ac ôl marc sbectol ar ei  
drwyn.

Gwên lydan, garedig a'i ddwylo cynnes  
yn pysgota am y paced mintys yn llwch ei boced.

Ond yna, agorodd giatiau ei hanes  
A'n cymell i gamu drwyddynt,  
Ein cludo o Gymru ein presennol  
I'w Almaen gynt, dan grafanc y Natsi.  
A'i brop oedd y nod ar ei arddwrn  
Yn atgof parhaol o'i orffennol  
A'r uffern fawr a brofodd.

Na, nid unrhyw daid cyffredin mohono,  
A'r graith a lechai dan ei lawes  
Yn ein siarsio i drysori ein dyfodol.

*Lois Medi Wiliam*  
*10C1*

